

Mga mugbo nga kinutlo gikan sa “Dinaghan nga Kaminyoon sa Kirtland ug Nauvoo”

Mga Mugbong Sinulat nga Hisgotanan sa Ebanghelyo (topics.ChurchofJesusChrist.org)

Ang mga Santos sa Ulahing mga Adlaw mituo nga ang monogamiya—ang kaminyoon tali sa usa ka lalaki ug sa usa ka babaye—mao ang walay pagkausab nga kasamtangang balaod sa Ginoo mahitungod sa kaminyoon. Sa kapanahonan sa biblia, ang Ginoo misugo sa pipila sa Iyang katawhan sa paghimo og dinaghan nga kaminyoon—ang pakigminyo sa usa ka lalaki ug sobra sa usa ka babaye. Ang ubang nahaunang mga miyembro sa Ang Simbahan ni Jesukristo sa mga Santos sa Ulahing mga Adlaw nakadawat usab ug mituman niining sugo nga gihatag pinaagi sa mga propeta sa Ginoo.

Human madawat ang usa ka pagpadayag nga nagsugo kaniya sa pagbuhat og dinaghan nga kaminyoon, si Joseph Smith nakigminyo og daghang asawa ug mitudlo sa maong buhat ngadto sa suod nga kaubanan. Kini nga baroganan maoy usa sa labing lisod nga aspeto sa Pagpahiuli—alang ni Joseph mismo ug sa ubang miyembro sa Simbahan. . . .

Ang mga Sinugdanan sa Dinaghan nga Kaminyoon sa Simbahan

. . . Gisultihan ni Joseph ang iyang mga kaubanan nga usa ka anghel ang mipakita kaniya tulo ka higayon niadtong tungatunga sa tuig 1834 hangtod 1842 ug misugo kaniya nga sugdan na ang dinaghan nga kaminyoon dihang nagpanuko siya sa pagtuman niini. Panahon sa ikatulo ug kataposang pagpakita, ang anghel miabot nga nagdala og hinulbot nga espada, mihulga sa paglaglag kang Joseph gawas kon ipadayon niya ug tumanon sa hingpit ang maong sugo. . . .

Joseph ug Emma

Ang dinaghan nga kaminyoon lisod alang sa tanan nga nalambigit. Alang sa asawa ni Joseph Smith nga si Emma, usa kadto ka labihan ka lisod nga pagsulay. Dili kaayo daghan ang mga rekord sa mga reaksyon ni Emma mahitungod sa dinaghan nga kaminyoon; wala siya magbilin og kaugalingon niyang mga asoy bahin niini, nga naghimong imposible ang pagtino kon unsay iyang hunahuna mahitungod niini. Si Joseph ug si Emma may labihan nga paghigugma ug pagtahod sa usag usa. Human nga gihimo niya ang dinaghan nga kaminyoon, giyagyag niya ang iyang mga pagbati didto sa iyang journal alang sa iyang “pinalangga nga si Emma,” kinsa iyang gihulagway isip “halangdon ug dili matarog, walay pagkausab, mabination nga si Emma.” Human sa pagkamatay ni Joseph, nagkuwentas si Emma og ginunting nga buhok ni Joseph nga gisulod sa gamayng sudlanan. . . .

Pagsulay ug ang Espiritwal nga Saksi

. . . Sumala ni Helen Mar Kimball, miingon si Joseph Smith nga “ang pagbuhat niini nga baroganan mao ang labing lisod nga pagsulay sa mga Santos aron sa pagsukod sa ilang pagtuo.” . . .

Ang desisyon sa pagdawat sa ingon niana kalisod nga pagsulay sa kasagaran moabot lamang human sa labihan ka sinsero nga pag-ampo ug makapahinuklog sa kalag nga pagpamalandong. Miingon si Brigham Young nga, dihang nahibaloan ang mahitungod sa dinaghan nga kaminyoon, “labing una kadtong higayon sa akong kinabuhi nga nagtinguha ko nga mamatay.” “Kinahanglan kong mag-ampo nga walay hunong,” miingon siya, “ug kinahanglan nakong ipakita ang akong pagtuo ug ang Ginoo mipadayag ngari nako sa kamatuoran niini ug kana nakatagbaw nako.” . . .

Si Lucy Walker nahinumdom sa gubot niyang pagbati sa dihang gidapit siya ni Joseph Smith nga mahimo niyang asawa. “Ang matag pagbati sa akong kalag misupak niini,” misulat siya. Bisan pa niana, human sa pipila ka gabii nga pag-ampo nga wala mahimutang, nakakaplag siya og kahupayan sa dihang ang iyang kwarto “napuno sa balaang impluwensya” susama sa “masanag nga kahayag sa adlaw.” Miingon siya, “Ang akong kalag napuno sa matam-is nga kalinaw nga wala sukad nako mahibaloi”, ug ang “hilabihan nga kalipay misulod sa akong tibuok pagkatawo.”

Panapos

Ang hagit sa pagpaila sa baroganan nga kontrobesyal sama sa dinaghan nga kaminyoon lisod kaayong pasobrahan sa pagpasabot. Ang usa ka espirituhanong pagsaksi sa kamatuoran niini nagtugot kang Joseph Smith ug sa ubang mga Santos sa Ulahing mga Adlaw sa pagdawat niini nga baroganan. Bisan og lisod kadto, ang pagsugod sa dinaghan nga kaminyoon didto sa Nauvoo sa pagkatinuod “nakapasanay og binhi” ngadto sa Dios. Ang igong gidaghanon sa mga miyembro karon naggikan niining matitud-anong mga Santos sa Ulahing mga Adlaw nga mibuhat sa dinaghan nga kaminyoon.